

COMMUNICAZIUN A LAS MEDIAS

Landquart, ils 1 da fanadur 2024

Permissiun da construcziun cun vigur legala per l'implant solar alpin sin il Vorab

L'implant solar alpin planisà sut il Gletscher dal Vorab ha cuntanschì in term impurtant. Il project da la Gruppa Arena Alva e Repower è in dals emprims projects solars alpins en Svizra che dispona d'ina permissiun da construcziun giuridicamain valaivla. Entaifer il termin da protesta legal n'èn entrads nagins recurs.

La regenza grischuna ha dà al project solar Vorab en la vischnanca da Laax la permissiun da construcziun d'emprima istanza gia la fin da matg 2024. Suentar che nagin n'ha fatg diever dal dretg da recurs entaifer il termin da protesta da 30 dis, dispona il project d'ina permissiun da construcziun legalmain valaivla. L'implant solar sin il Vorab tutga uschia tar ils emprims projects en Svizra che han survegnì ina permissiun da construcziun cun vigur legala en il rom da l'uschenumnà Solarexpress.

Energia solara favuraivla al clima per las pendicularas

L'implant solar autalpin duai vegnir construi en l'ost da la lieunga dal gletscher, damanaivel da la staziun da muntogna dal Vorab. Igl è planisà d'installar var 22'000 moduls sin ina surfatscha da var 150'000 meters quadrat. Quels furnissan var 12 GWh electricidad ad onn cun ina prestaziun productiva da var 8,6 MW. La Gruppa Arena Alva fiss ina consumenta impurtanta da l'energia solara producida sin plaun local. L'implant solar sin il Vorab produciss dapli electricidad che la Gruppa Arena Alva dovra ad onn per tut ils implants da pendiculara inclusiv l'ennavada. La Gruppa vegniss uschia in grond pass pli datiers da sia visiun da sa transformar da la consumenta a la producenta.

La rentabilitad è ina gronda sfida

Las investiziuns bruttas per realisar l'implant solar alpin vegnan stimadas a passa CHF 35 milliuns. Malgrà ch'il lieu sut il Gletscher dal Vorab è fitg adattà en plirs regards per construir e gestiunar in implant solar alpin e malgrà ch'il project po far quint cun contribuziuns federalas, resta la rentabilitad ina gronda sfida. Quai è er il motiv, per il qual ils iniziants n'han anc prendì nagina decisiun da construcziun. Las Pendicularas Arena Alva SA e Repower vegnan a pudair prender questa decisiun pir, cura ch'èn avant maun las offertas liantas e scleridas las contribuziuns federalas.

Contacts

Repower AG
Post da medias
t +41 81 423 77 00
medien@repower.com

Gruppa Arena Alva
Post da medias
t +41 81 927 70 26
medien@laax.com

Quai è Repower

L'interpresa Repower è dapi 120 onns activa sco producenta d'electricidad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Küblis, Landquart, Turitg e Milano. Repower è activa lung l'entira chadaina da valurisaziun da l'electricidad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricidad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.